

# Napparsimasunut siunnersortit pillugit Namminersorlutik Oqartussat nalunaarutaat

Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni nr. 11, 12. juni 2019-imeersumi § 40 naapertorlugu aalajangersarneqarput:

## Kapitali 1

### *Napparsimasunut siunnersortinngortitsineq*

§ 1. Kalaallit Nunaanni Eqqartuussivimmi eqqartuussisup napparsimasunut siunnersortit nalunaarsussavai aqqi, najugai, oqarasuaataasa normui, e-mailii, suliffii suliffisa oqarasuaataasa normui naqinnerit tulleriinneri naapertorlugit tulleriiaarlugit.

*Imm. 2.* Napparsimasunut siunnersortit najugaasa, oqarasuaataasa normuisa il.il. allanngorneri Dronning Ingridip Napparsimmavissuani tarnikkut nappaatilinnut immikkoortortaqaqfimmi ingerlaavartumik nalunaarsorneqartassapput. Napparsimasunut siunnersortinik nutaanik atorfinitsitsinermi imaluunniit § 14, imm. 1 naapertorlugu napparsimasunut siunnersortip nalunaarsuiffimmiit peerneqarnissani kissaatigippagu, kiisalu napparsimasunut siunnersorti § 14, imm. 2 naapertorlugu siunnersortaajunnaarsinneqarpat Kalaallit Nunaanni Eqqartuussivimmi eqqartuussisoq nutaamik nalunaarsugaliussaaq, peqatigisaanillu imm. 1-imi eqqaaneqartoq suleriaaseq naapertorlugu attavissanut paasissutissat allannguutaat nutarterneqassallutik nassiunneqassallutillu.

## Kapitali 2

### *Napparsimasunut siunnersortinik ivertitsineq*

§ 2. Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 1, imm. 2 malillugu pinngitsaaliinikkut unitsitsinermi, tassunga ilanngullugu qitiusumik napparsimmavimmi peqqissaavimmiluunniit pinngitsaaliinikkut unitsitsinerup aallartinneqarnerani, aamma pinngitsaaliisummik uninngatitsinermi kiffaanngissusiagaanerup aallartinneqarneranut atatillugu siunnersortimik ivertitsisoqassaaq. Aallartitsinertut isigineqassaaq napparsimasooq napparsimmavimmi peqqissaavimmiilluunniit tiguneqariaannartoq aamma napparsimasooq piumassuserinngisaminik pinngitsaaliisummik tiggummigallarneqarpat.

*Imm. 2.* Pinngitsaaliisummik iliuuseqarnerni allani pinngitsaaliisummik iliuuseqarnissaaq aalajangiunneqarpat ivertitsisoqassaaq.

§ 3. Napparsimasoq siusinnerusukkut uninnganermi napparsimasunut siunnersortilerneqarsimappat napparsimasunut siunnersorti taanna nalinginnaasumik ivertinneqassaaq.

*Imm. 2.* Tarnimikkut napparsimasunik nammieersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 1, imm. 2 naapertorlugu pinngitsaaliinikkut unitsitsinernik aallartitsinermi peqqinnissaqarfik pineqartoq napparsimasumik uninngasuuteqarallartoq, sapinngisamik piaarnerpaamik unitsitsineq pillugu Dronning Ingridip Napparsimmavissuani tarnikkut nappaatilinnut immikkoortortaqaarfimmut nalunaaruteqassaaq, taamaalilluni napparsimasunut siunnersortimik ivertitsisoqarsinnaaniassammat.

§ 4. Napparsimasoq erseqqissumik noqqaasimanngippat napparsimasunut siunnersortit pillugit nalunaarsugaatini ilanngunneqarsimasuni napparsimasunut siunnersortimik ivertitsineq pisinnaanngilaq, napparsimasunut siunnersortip pineqartup suliai assigisaaluunniit pissutigalugit, tassunga ilanngullugu assersuutigalugu napparsimasumut pineqartumut kommunimi sullissisoq, pissusissamisoortumik napparsimasup soqutigisaanik isumaginninnissamut naleqquttuunera pillugu nalornilersitsisunik peqarpat.

§ 5. Siunnersortimik ivertitsineq nalinginnaasumik oqarasuaatikkut pissaaq, kingornatigullu allakkatigut uppersarsarneqassalluni. Napparsimasunut siunnersortip, assersuutigalugu angalanera, napparsimanagera assigisaaluunniit pissutigalugu aporfeqannginnissaanut Dronning Ingridip Napparsimmavissuani tarnikkut nappaatilinnut immikkoortortaqaarfimmi peqqissaasoq pingaartoq qulakkeerinnissaaq.

*Imm. 2.* Napparsimasunut siunnersorti napparsimasunut allanut siunnersortitut ivertinneqareersimaguni ivertinneqarnissamut itigartitsisinnaavoq.

§ 6. Napparsimasunut siunnersortitut ivertinneqareersimasup napparsimasunut siunnersortit pillugit nalunaarsukkani ilaasumit allamit taarserneqarnissaa pillugu napparsimasumiit noqqaasoqarpat, tamannalu tunngavissaqartutut nalilerneqarpat, Dronning Ingridip Napparsimmavissuani tarnikkut nappaatilinnut immikkoortortaqaarfimmit akuerineqassaaq. Taamatut noqqaanermut immikkoortortaqaarfik pineqartoq itigartitsippat tamanna Kalaallit Nunaanni Eqqartuussivimmi eqqartuussisumut naammagittaalliutigineqarsinnaavoq.

### Kapitali 3

#### *Napparsimasunut siunnersortip suliassai pisinnaatitaaffilu*

§ 7. Napparsimasunut siunnersorti napparsimasoq isumasioqatigalugu sapinngisamik iliuuseqartassaaq.

§ 8. Tarnimikkut napparsimasunik nammieersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 35, imm. 3 malillugu suliassanik suliaqarnermi napparsimasunut siunnersortip ilaatigut pinngitsaaliisummik iliuuseqarneq siunnersortinngortinneqarnermut patsisaasup pisariaqanngitsumik sivitsorneqannginnissaa nakkutigissavaa.

*Imm. 2.* Aammattaaq napparsimasunut siunnersorti Tarnimikkut Nappaatillit Maalaarutaannik Aalajangiisartunit aalajangikkat paasissutissiarineqarneranut ikiutissaaq.

§ 9. Napparsimasunut siunnersortip suliassaata avataaniipput napparsimasup aningaasaqarnikkut atugai kiisalu inuttut atugai allat peqqinnissaqarfimmi unitsinneqarnermut, najugaqarnermut katsorsartinnermullu tunngassuteqanngitsut.

§ 10. Napparsimasunut, angerlareernerup kingorna pinngitsaaliisummik malittarineqartussanut, pulaarnej siulleq napparsimasup angerlartinneqarnissaa sioqqullugu pissaaq. Angerlartinneqarnerup kingorna atassuteqarneq taamaallaat pissaaq napparsimasup noqqaaneratigut taamaallaallu peqqinnissaqarfiup nalunaarasuartaatikkut atortui aqqutigalugit. Napparsimasooq Nuummi najugaqarpat oqarasuaatikkut allatigullu nalunaarasuartaatikkut atassuteqarneq Dronning Ingridip Napparsimmavissuanut pulaarnermik taarserneqarsinnaavoq, tamanna napparsimasup kissaatigippagu.

*Imm. 2.* Napparsimasup noqqaaneratigut napparsimasunut siunnersortip pulaarnissaa imaluunniit oqarasuaatikkut oqaloqatiginninnissaa pillugu isumaqatigiissuteqarnissap qulakkeerneqarnissaa katsorsaavimmi nakorsap akisussaaffigaa.

*Imm. 3.* Napparsimasunut siunnersorti napparsimasumik peqqinnissaqarfimmi uninnganerani ornigulluni, allakkatigut, oqarasuaatigut allatigulluunniit nalunaarasuartaatigut napparsimasumik killilersorneqarnani akornusersorneqarnanilu akeqanngitsumik atassuteqarnissaminut pisinnaatitaavoq.

§ 11. Napparsimasunut siunnersorti napparsimasumut pineqartumut siunnersortaaffigisaminutpaasissutissanik pinngitsaaliisummik nalunaarsuiffimmi paasissutissiissutigineqartunik paasiniaanissamut pisinnaatitaaffeqarpoq.

*Imm. 2.* Taamatuttaaq napparsimasut inatsisitigut inissisimanerat pillugu Inatsisartut peqqussutaanni § 20 naapertorlugu napparsimasumut paasissutissat allattorsimasut imarisaanik, katsorsaaniissamut pilersaarut ilanngullugu napparsimasooq nammineerluni takunnikkusuppat aamma napparsimasooq napparsimasunut siunnersortip napparsimasumut paasissutissat allattorsimasut imarisaanik takunnissinnaaneranut akuersilluni nalunaaruteqarpat napparsimasunut siunnersorti napparsimasumut paasissutissat allattorsimasut imarisaanik paasiniaanissamut pisinnaatitaaffeqarpoq

§ 12. Napparsimasunut siunnersortitut sulisoq pinerluttulerinermut inatsit malillugunapparsimasup inuttaa imaluunniit inuttut atugai pillugit sulinermini paasisani suusinnaasulluunniit pillugit nipangiussimasussaataavoq, tassunga ilanngullugit peqqissutsikkut atugai.

#### **Kapitali 4**

*Siunnersortitut ivertitsinerup atorunnaarnera il.il.*

§ 13. Pinngitsaaliisummik iliuuseqarneq taamaatinneqarpat napparsimasunut siunnersortitut ivertinneqarneq aamma atorunnaassaaq. Pinngitsaaliisummik iliuuseqarnerup taamaatinneqarnera pillugu Dronning Ingridip Napparsimmavissuani tarnikkut nappaatilinnut immikkoortortaqaqarfimmi peqqissaasumit pigaartumit napparsimasunut siunnersortimut nalunaarutigineqassaaq. Piffissami sivikitsumi pinngitsaaliisummik iliuuseqarnermi napparsimasunut siunnersortip siullermik pulaarnissaa sioqqullugu taamaatinneqartuni siunnersortitut ivertinneqarneq aatsaat atorunnaassaaq nalunaarasuartaatigut atassuteqarneq imaluunniit pulaarnej pereerpat.

*Imm. 2.* Imm. 1-imi aalajangersagaq apeqqutaatinnagu naammagittaalliutitut pilersinneqareersimasunut atatillugu imaluunniit pinngitsaaliisummik iliuuseqarnerup taamaatinneqarneranut atatillugu naammagittaalliutaasimasunut napparsimasunut siunnersorti napparsimasumut ikiutissaaq.

*Imm. 3.* Napparsimasunut siunnersortitut ivertinneqarsimasoq allamik taarserneqarpat aamma siunnersortitut ivertitsineq atorunnaassaaq, tak. § 6.

**§ 14.** Napparsimasunut siunnersorti napparsimasunut siunnersortit pillugit nalunaarsugaatinit peerneqarnissani qaqugukkulluunniit piumasarisinnaavaa. Peerneqarnissamut qinnuiginninneq Dronning Ingridip Napparsimmavissuani tarnikkut nappaatilinnut immikkoortortaqaqfimm, napparsimasunut siunnersortip nalunaarsuiffimmiit peerneqarnissaaq pillugu kissaateqarneranik Kalaallit Nunaanni Eqqartuussivimmi eqqartuussisumut ilisimatitsisussamut, nalunaarutigineqassaaq.

*Imm. 2.* Napparsimasunut siunnersorti napparsimasunut siunnersortit pillugit nalunaarsuiffimmut ilanngunneqarsimasoq suliassap malitsigisaanik pisussaaffinnik annertuumik sumiginnaappat imaluunniit suliassamut tulluanngitsoq paasineqarpat napparsimasunut siunnersortaajunnaarsinneqassaaq. Napparsimasunut siunnersortaajunnaarsitsinermi napparsimasunut siunnersortit pillugit nalunaarsugaatinit pineqartoq peerneqassaaq. Saaffiginnissutit napparsimasunut siunnersortit suliassaminnik annertuumik sumiginnaaneranun tunngassuteqartutt Dronning Ingridip Napparsimmavissuani tarnikkut nappaatilinnut immikkoortortaqaqfimm saaffiginnissutigineqassapput. Immikkoortortap naammagittaalliutit Kalaallit Nunaanni Eqqartuussivimmi eqqartuussisumut ingerlateqqissavai immikkoortorta q tamatumunnga oqaaseqaatinik ilassutissanik peqaruni ilanngullugit.

*Imm. 3.* Imm. 2 malillugu napparsimasunut siunnersortitut sulinerup atorunnaarnera pillugu aalajangiineq Kalaallit Nunaanni Eqqartuussivimmi eqqartuussisumit aalajangiiffigineqassaaq. Eqqartuussiviup aalajangiinera Dronning Ingridip Napparsimmavissuani tarnikkut nappaatilinnut immikkoortortaqaqfup napparsimasunut siunnersortimut nalunaarutigissavaa.

*Imm. 4.* Imm. 1 imaluunniit imm. 2 naapertorlugu napparsimasunut siunnersortit pillugit nalunaarsugaatinit peerneqarnerup kingunerani pineqartumik ivertitseqqinneq pisinnaangilaq. Taamatuttaaq imm. 2 naapertorlugu peerneqarnerup kingunerisaanik napparsimasunut siunnersortitut ivertinneqarnerit atorunnaarsinneqassapput.

*Imm. 5.* Napparsimasunut siunnersortit napparsimasunut siunnersortit pillugit nalunaarsugaatini ilanngunneqarsimanngitsut imm. 2-mi piumasaqaatit eqqaaneqartut assigannik suliunnaartinneqarsinnaapput. Tamanna pillugu aalajangiineq Kalaallit Nunaanni Eqqartuussivimmi eqqartuussisumit imm. 2-mi eqqaaneqartutut suleriaaseq assigalugu aalajangiiffigineqassaaq.

## **Kapitali 5**

### *Akissarsiat*

**§ 15.** Napparsimasunut siunnersortitut ivertinneqartunut napparsimasunut siunnersortit pillugit nalunaarsugaatini ilaasunut akissarsianik Peqqinnissamut Aqutsisoqarfik akissarsisitsissaaq, napparsimasumut atorneqartup pinngitsaaliinikkut akuliunnerup sivilissusai naapertorlugit aalajangersarneqartut akigitat uku malillugit:

1) Ullunik 0-7-inik sivilissususeqartunut pinngitsaaliisummik iliuuseqarnernut 1.098,45 kr.

2) Ullunik 8-30-nik sivilissuseqartunut pinngitsaaliissummik iliuuseqarnernut 1.647,67 kr.

3) Ullunik 30-nik sivilissuseqartunut pinngitsaaliissummik iliuuseqarnernut qaammatit pingajussaata aallartinnerinut tamanut 2.157,59 kr.

*Imm. 2.* Napparsimasunut ataatsimut sivikitsumik sivilissuseqartumik uteqattaartumik napparsimasunut siunnersortitut ivertitsinerni, tak. § 3, imm. 1, oqaaseqatigiit aappaat, ivertitsinerup siulliup kingorna napparsimasunut siunnersortinngortitsinernut akissarsiat siunnersortinngortitsinermut ataatsimut immikkut pisuni 549,22 kr.-nut ikilisinneqassapput.

*Imm. 3.* Procenti aqqiissutissaq aamma maannakkorpiaq aningaasarsiat pillugit Inatsisartut inatsisaat naapertorlugu ukiumoortumik procenti aqqiissutissaq malillugu akigitat naleqqussarneqartassapput. Ukiumoortumik procenti aqqiissutissaq tunngavigalugu akinik naleqqussaanerit ukiup tulliani 1. januarimiit atuutilissapput.

**§ 16.** Aningaasat § 15, imm. 1-mi aamma 2-mi taaneqartutsulinerumut atatillugu pulaarnermut, naammagittaalliutit sulianut il.il. napparsimasunut siunnersortit sulineranut akissarsiat saniatigut aningaasartuutitut suliamut attuumassuteqartunut aamma matussutaapput, tassunga ilanngullugit assartuinermit aningaasartuutit aamma oqarasuaatitut il.il. aningaasartuutit.

*Imm. 2.* Immikkorluinnaq pisuni § 15, imm. 1-mi eqqaaneqartut aningaasat suliap qanoq annertutiginerapeqqutaatillugu Peqqinnissamut Aqutsisoqarfimmiik qaffanneqarsinnaapput imaluunniit appartinneqarsinnaapput.

## **Kapitali 6**

*Atuutilersitsinermut atorunnaarsitsinermullu aalajangersakkat*

**§ 17.** Nalunaarut ulloq 26. april 2024-mi atuutilissaaq.

*Imm. 2.* Peqatigitillugu napparsimasunut siunnersortit pillugit Namminersorlutik Oqartussat nalunaarutaat nr. 16, 26. august 2015-imeersoq atorunnaarsinneqarpoq.

*Namminersorlutik Oqartussat, ulloq 23. april 2024*

**Agathe Fontain (atsior.)**

Peqqissutsimut Naalakkersuisoq

/ Nike Berthelsen (atsior.)

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut